

MISSA Y'ISANGIRA RYA NYAGASANI MURI KATEDRALE KU NYUNDO

Tariki 29 werurwe 2018 ku wa kane mutagatifu Umwepiskopi yatuye Igitambo cy'Ukaristiya atwibutsa isangaira rya nyuma rya Yezu n'abigishwa be. Ubutumwa yatanze kuri uwo mugoroba ni ubu bukurikira :



Bakristu, Bavandimwe, muri iyi minsi itatu mitagatifu ari nayo isoza igihe cy'igisibo twari tumazemo iminsi,turazirikana amayoberashingiro y'ukwemera kwacu. Ku wa kane mutagatifu twibuka Nyagasani Yezu Kristu arema Isakramentu ry'Ukaristiya rikubiyemo ibyamubayeho byose,ari byo : urupfu n'izuka rye. Ku wa kane mutagatifu kandi twibuka ko yaremye n'Isakramentu ry'Ubusaseridoti ku girango abasaseridoti bajye bafasha umuryango w'Imana wose guhora umwibuka ko yatwitangiye ku musaraba kandi akatwitangaho ifunguro ry'ubuzima bw'iteka. Ni byo twibuka buri gihe mu gitambo umusaseridoti aturira imbaga y'abakristu. Isangira rya nyuma Yezu Kristu yagiranye n'abigishwa be, ari nabo bari inshuti ze zinkoramutima,akanarikorera umuhango wo koza ibirenge by'intumwa ze, ni ikimenyetso cy'urukundo kandi bikaba impamba yadusigiye muri uru rugendo rwacu rwahano kw'isi.

Ejo ku wa gatanu mutagatifu tuzaba turi hamwe mu rupfu rwe rwo ku musaraba. Naho ku mugoroba w'ejo bundi kuwa gatandatu tuzaba turi hamwe nawe mu byishimo by'izuka rye mu bapfuye. Yezu yadusigiye iyo nyabutatu ku girango tujye duhora twibuka ko yatwitanzeho ifunguro ry'ubuzima bw'iteka, tuzajye duhora twibuka ko yatwitangiye ku musaraba, twibuka ko urukundo yadukunze ari impamba yaduhaye muri uru

rugendo rwacu kuri iyi si, tuzajye duhora twibuka ko yizuye mu bapfuye ngo natwe tuzagire uruhare ku izuka rye.

1 Isangira rya nyuma rya Nyagasani

Ku mugoroba nk'uyu nguyu turimo,umugoroba wa nyuma w'ubuzima bwa Yezu Kristu kuri iyi si, yakoranyije za nshuti ze z'umwihariko 12,zazindi bari baragendanye, zazindi bari bararuhanye,zazindi bari baraganiriye byinshi, zazindi bari barasangiyeye byinshi,kugirango basangire bwa nyuma.

Uwo mushyikirano wa nyuma niwo wabayeye Pasika yanyuma Yezu yari yarifuje kuva kera. Ni Pasika idutegurira kandi ikadutegurira mu marenga rya sangira ridutegereje mu bwami bw'ijuru aho Yezu yagiye kudutegurira imyanya n'ibyicaro. Mu isomo rya mbere twumvise ryo mu gitabo cy'Iyimukamisiri,muri bwa butumwa Uhoraho yabwiraga Musa na Aroni bwari bugenewe abayisiraheri twumvisemo igisa na Pasika yabo. Aho bahamagarirwa gusangira kandi nabo iryo sangira rizababera urwibutso ruzahoraho iteka. Natwe bakristu bavandimwe duhimbaza uyu wa kane Mutagatifu, isangira rya Nyagasani Yezu Kristu ritwibutse ya Pasika, ari ryo sangira ry'umuryango w'abana b'Imana wavuye mu bucakara warimo mu gihugu cya Misiri bagana mu gihugu cy'ubwigenge Uhoraho yari yarasezeranije abasokuruza babo. Ni Pasika ya Nyagasani Yezu, Ntama-Imana waje kutwitangaho igitambo ngo adukize twebwe twese imbaga y'Imana kandi y'ibihe byose. Natwe Pasika ya Nyagasani Yezu igomba kudukura mu mwijima w'ibyaha ikatujyana mu rumuri rw'ubuzima bw'abana b'Imana nk'uko abayisiraheli bavanywe mu bucakara barimo mu gihugu cya Misiri bagana mu gihugu cy'ubwigenge.

Iri sangira rya Yezu Kristu n'intumwa ze rijye ritwibutsa natwe isangira ridutegereje mu bwami bw'ijuru. Ubwo bukwe bwa Ntama w'Imana invitation yabwo tuyigezwaho buri gihe mu Ijambo ry'Imana. Iyo umuntu ahawe invitation akiyemeza gutaha ubukwe, arabyitegura,agategura umwambaro azaserukana muri ubwo bukwe. Natwe bakristu bavandimwe, tujye duhora twiteguye, kubwira Yezu Kristu ko twiteguye gutaha ubukwe adutumiramo.

2 Muri iryo sangira rya nyuma Yezu yogeje ibirenge by'intumwa ze

Ngo igihe bari ku meza Yezu arahaguruka afata igitambaro, asuka amazi ku ibesani, maze yoza ibirenge by'abigishwa be,akabihanaguza igitambaro yari

akindikije. Twabyumvise ko ngo arangije yasubiye ku meza akabaza abigishwa be ati : Ese aho mwumvise ibyo maze kubakorera ? Natwe mu kanya turaza kwigana icyo gikorwa Yezu yakoze yoza ibirenge by'Intumwa ze. Ese aho twebwe twumva uwo muhango dukora buri wa kane mutagatifu twumva icyo usobanura ? Twumve neza igisobanuro Yezu yahaye abigishwa be. Ati : munyita Mwigisha na Nyagasani, kandi mubivuga ukuri ni byo koko. None rero niba nje Umwigisha na Nyagasani nojeje ibirenge byanyu,namwe mugomba kozanya ibirenge. Mbahaye urugero kugirango uko mbagenjereje , namwe azabe ariko muzajya mubigenza.

Nguwo umurage ukomeye Yezu yasigiye abigishwa be,umurage natwe abemera twese twahawe. Ubusanzwe tumenyereye ko umuntu araga abe imitungo,amazubambu,amatungo, amafaranga kubayafite n'ibindi. Yazu nk'Imana ntiyari kubura ibyo araga abigishwa be, nyamara twumve neza uwo murage uremereye udasanzwe kandi wuzuye ubukungu yabahaye, kandi natwe tugomba kugira uwacu. **Kozanya ibirenge.** Ibyo bisobanuye iki kuri twebwe uyu muni ? Ibyo biratwigisha iki twebwe ab'iki gihe ? Yezu arashaka kutwigisha guca bugufi. Yezu wari umwigisha na Nyagasani yashatse kwereka abigishwa be ko umukristu nyawe atagomba gutwarwa n'ibyubahiro gusa, ni ukuvuga wawundi uhora ategereje ko bamuhereza, ko bahora bamwita nyakubahwa ndetse akanabigendera. Yezu yashatse kutwisha ko icyubahiro cy'ukuri gishingiye ku kwitangira abandi, guhora uharanira icyagirira abandi akamaro, icyabazanira imibereho myiza, amajyambere,amahoro,ubumwe,ubutabera kuri buri wese no kuri bose.

Kuba mukuru bigomba gushingira ku rukundo ugirira buri wese utarebye igihagararo, ahubwo ukamukundira, ukamufashirizako ari umwana w'Imana nkawe. Imana ntabwo idukundira igihagararo cyacu, idukundira ko turi abana bayo kandi twese, ikadukunda itarobanuye. Ni ya Mana ivusha izuba ku babi no kubeza, ni ya Mana igusha imvura kubabi n'abeza, ni ya Mana idakangwa n'igihagararo, amashuri, ubukungu, ahubwo itubona twese nk'abana bayo bakunzwe kimwe kandi kibyeyi.

Nyagasani Yezu ati : Mbahaye itegeko rishya : Nimukundane, kandi mukundane nk'uko nabakunze. Nicyo bose bazamenyeraho ko muri abigishwa banjye, ni mugirirane urukundo. Mu Ivanjili twumvise ukuntu intumwa za Yezu zitumvaga uko kwicisha bugufi kugezaho aboza ibirenge. Petero ati : Nyagasani,abe ari wowe unyozza ibirenge ? Yezu

nawe aramusubiza ati : ibyo nkora ubu ntiwabimenya, ariko uzabimenya hanyuma. Koko rero , bavandimwe hari igihe natwe tutumva ibikubiye mu rugero rwa Yezu rwo kwicisha bugufi. Natwe biratugora. Nyamara Yezu aratwereka ko kwikuza kwacu hano kuri ii si,ntagaciro bifite mu maso y’Imana. Nibyo Yezu yabwiraga Petero ati : ndamutse ntakogeje ibirenge, ntuzigera ugira umugabane hamwe nanjye.

Bakristu bavandimwe,kugira ngo tuzagire umugabane hamwe na Yezu Kristu mu bwami bwe, ni ngombwa ko twemera koga natwe. Ibyo bivuze iki ? Ibyo bivuze ko tugomba kwemera kuyoborwa nawe, tukagenza nkawe,tugaca bugufi nkawe, tugakunda nkawe. Tukagendana nawe muri byose. Ntibyemewe ku mukristu ko yakumva yakwigendera wenyine atari kumwe na Kristu. Uko iyo tugiye gusohoka twitwaza irangamuntu, ni ko na Yezu Kristu atagomba kubura mu buzima bwacu bwose,haba mu mvugo, mu migirire, mu mitekerereze. Ngira go tubikoze dutyo twese ntacyaha, nta nabi yakongera kutugaragara, kuko bishatse kuba Yezu atadukundira. Yakubwira ati : sigaho, ibyo ushaka kujyamo sibyo, ibyo ushaka kuvuga sibyo,ibyo utekereza sibyo. Buriya rero bitubaho kuko tuba twiyambuye Kristu.

Bakristu bavandimwe, ikimenyetso cy’umuyobohe nyawe wa yezu Kristu si ikindi kindi kitari urwo rukundo rwuje ukwicisha bugufi nk’urwa Yezu Kristu. Ni uko gushyira Kristu mu buzima bwawe bwose ntaho umukinze, ntacyo umuhishe. Ni ukubaho nk’uko yabayeho,ni ukwitanga nk’uko yitanze, ni ugukunda nk’uko yadukunze. Yezu ati : **Ni mujye mukundana nk’uko nabakunze.**

3 Nimwakire murye ,iki ni umubiri wanjye

Urwo rukundo yibukije abe kandi natwe atwibutsa muri wa muhango wo koza ibirenge,yarushijeho kurushimangira mu gikorwa kizahoraho kugeza igihe azahindukirira mu ikuzo. Isakramentu ry’Ukaristiya n’iry’ubusaseridoti yaremye kuwa kane mutagatifu,igihe yavugiraga ku mugati ati : iki ni umubiri wanjye, no kuri divayi ati : iki ni amaraso yanjye, y’isezerano rishya agiye kumenerwa abatabarika kubera ibabarirwa ry’ibyaha byabo. Nanone akarema Isakramentu ry’ubusaseridoti agira ati : ibi mujye mubikora bibe urwibutso rwanjye. Muri aya magambo niho hakubiyemo ububasha yahaye intumwa ze n’abazizunguye bose,gutura Ukaristiya kugeza igihe azagarukana ikuzo. Yezu yaremye Ukaristiya rero ku girango twifatanye nawe mu gitambo cye ku musaraba kugeza igie azagarukana

ikuzo. Bakristu bavandimwe, mbifuriye urukundo nk'urwo Kristu yadukunze. Murakagira ababakunda nka Kristu, kandi murakagira ababishimira kuko mubakunda nka Kristu.

Nyagasani Yezu nabane namwe.



Nyuma y'umuhango wo kuza ibirenge nk'ikimenyetso cy'urukundo Yezu yasigiye intumwa ze ,nyuma kandi y'Igitambo cya Missa habayeho no kwimura Isakramentu Ritagatifu nk'uko bisanzwe bigenda ku wa kane mutagatifu.





Padiri Jean Marie KWIZERA